

आकाशवाणी

खबरां विजय बजाज कोला

1. प्रधानमंत्री नरेन्द्र मोदी होरें आखेआ ऐ जे योग असें'गी संतुलित जीन जीने ते मानसिक सेहत दे राहें शारीरिक सेहत दी बत तुप्पने च मदाद करदा ऐ। मोदी होरें 12में योग दिवस गी मनाने च अज्ज राश्ट्र दी अगुवाई कीती।
2. प्रधानमंत्री नरेन्द्र मोदी होरें स्वदेशी तौर पर बनाए गेदे भारती नौसेना दे त्रै पोत - आईएनएस दुनागिरी, आईएनएस संशोधक ते आईएनएस अग्रय गी अज्ज राश्ट्र गी समर्पित कीता।
3. राश्ट्री योग्यता ते दाखला म्तेहान यानि नीट यू.जी दा म्तेहान अज्ज सख्त सुरक्षा बंदोबस्तें तैहत परतियै लैता गेआ ऐ।
4. अमरीका ते ईरान दे बशकार नाजुक अंतरिम समझौते गी मजबूत करने ते पच्छिम एशिया च जारी संघर्ष गी खत्म करने दे मकसद कन्नै कीती जा'रदी गल्लबात स्विट्जरलैंड च शुरू होई गेई ऐ।
5. मौसम विभाग नै अज्ज पच्छिम बंगाल दे तराई आहले इलाकें सने सिक्किम च मौलेधार बरखा दी भविष्यवाणी कीती ऐ।
6. हाकी च भारत ने मेजबान न्यूजीलैंड गी फाईनल च 2-सिफर कन्नै हराइयै एफ.आई.एच. महिला नेशन्स कप दा दुआ खिताब जिती लैता ऐ।

PM Yoga Role

प्रधानमंत्री नरेन्द्र मोदी होरें आखेआ ऐ जे योग असें'गी संतुलित जीन जीने ते मानसिक सेहत दे राहें शारीरिक सेहत दी बत तुप्पने च मदाद करदा ऐ। एह गल्ल उ'नें कोलकाता दे रेड रोड पर आयोजित योग दिवस आहले कार्यक्रमै च हिस्सा लेंदे होई आखी। देश दुनिया च अज्ज 12मां अंतरराष्ट्री योग दिवस मनाया गेआ। इस बरे इस ध्याड़े दा विशेषार ऐ: बधदी उम्र दे असर गी रोकने लेई योग'। इस मौके पर श्री मोदी होरें आखेआ जे दुनिया दे किश हिस्सें च 21 जून साल दा सब्भनें शा लम्मा दिन होंदा ऐ ते योग दे कारण एह हुन सबनें शा बड्डा सामुदायिक उत्सव बनी गेआ ऐ। प्रधानमंत्री होरें आखेआ जे योग छड़ा शारीरिक कसरत नेई ऐ, सगुआं भावना दी अभिव्यक्ति ऐ ते एह कुसै इक खास उम्री धोड़ी सीमित नेई ऐ। राष्ट्रपति द्रौपदी मुर्मू होरें अज्ज मध्य प्रदेश दे जबलपुर च योग दिवस आले कार्यक्रमै च मुख परोहने दे तौर पर शिरकत कीती। एह कार्यक्रम सदर इलाके गैरिसन ग्राउंड च आयोजित कीता गेआ। इस मौके पर किट्ठ अग्गे भाषण दिंदे होई राष्ट्रपति होरें आखेआ जे योग, भारत दी म्हान विरासत दा इक जशन ऐ ते इन्ने समूलची मनुक्ख जाति गी सेहतमंद, संतुलित ते नतीजाकुन जीवन दी बत दस्सने दा कम्म कीता ऐ।

तोआई उपराष्ट्रपति सी.पी. राधाकृष्णन होरें अज्ज लद्दाख दे लेह च आयोजित अंतर्राष्ट्रीय योग दिवस समारोह च हिस्सा लैता। इस मौके पर उ'नें नागरिकें दा आह्वान कीता जे ओह सेहतमंद, सुखी ते शांतिपूर्ण समाज लेई योग गी अपने रोजमर्रा दे जीवन दा अनटुट अंग बनान। उ'नें आखेआ जे योग छड़ा इक शारीरिक कसरत नेई ऐ सगुआं एह भारत आसेआ मनुक्ख जाति गी दिता गेदा इक प्राचीन तोहफा ऐ। उ'नें

आखेआ जे केई ब'रें दे ध्यान, तपस्या ते आध्यात्मिक खोज दे राहें भारत दे ऋषियें इक समग्र प्रणाली विकसित कीती ते एह प्रणाली शरीर दा पोषण करदी ऐ, मनै गी शांत करदी ऐ ते आत्मा गी उन्नत करदी ऐ। उपराष्ट्रपति होरें आखेआ जे बड़ी मती ऊंचाई पर जीवन जीवन लेई सैहनशक्ति, अनुशासन ते अनुकूलन समर्थ दी लोड़ होंदी ऐ ते एह ऐसे गुण न, जि'नेंगी विकसित करने च योग मददगार होंदा ऐ। तोआई अंतरराष्ट्री योग दिवस दे मौके उपपर लोकसभा अध्यक्ष ओम बिरला होरें अज्ज नमीं दिल्ली च स्थित संसद परिसर च आयोजित सामूहिक योग अभ्यास च हिस्सा लैता। सोशल मीडिया पर अपने संदेस च श्री बिरला होरें आखेआ जे योग व्यक्ति अंदर संतुलन, सबर ते सकारात्मक ऊर्जा दा संचार करदा ऐ ते राष्ट्र निर्माण च जोगदान देने लेई प्रेरित करदा ऐ। उ'नें लोकें गी योग गी अपनी दैनिक दिनचर्या दा हिस्सा बनाने दा संकल्प लैने दा आह्वान कीता। रक्षा मंत्री राजनाथ सिंह होरें मेघालय दे उपपर शिलांग च ईस्टर एयर कमान हैडक्वार्टर च आयोजित योग दिवस आहले कार्यक्रमै च हिस्सा लैता। उ'नें इस मौके पर सबनें गी गुजारिश कीती जे ओह योग गी अपने जीवन दा अहम हिस्सा बनान। देश-दुनिया दे बक्ख-बक्ख हिस्से च अज्ज अंतर्राष्ट्री योग ध्याड़ा बड़े जोश कन्ने मनाया गेआ ऐ।

<><><><><><>

LG- Yoga Day

उपराज्यपाल मनोज सिन्हा होरें 12में अंतरराष्ट्री योग दिवस सरबन्धी कार्यक्रम दी जम्मू-कश्मीर च अगुवाई कीती। उनें डल झील कश ऐतिहासिक योग सत्र च ज्हारां बद्दे लोकें कन्ने हिस्सा लैता। प्रतिभागिएं गी अपनियां शुभकामनां दिंदे होई उपराज्यपाल होरें इस

बरे दे विशेसार गी उजागर कीता ते मनुक्खता ते लोकें गी किट्ठे जोड़ने च योग दी भूमिका गी उजागर कीता। उनें आखेआ जे योग नै विश्व गी स्हेई मायने च जोड़ेआ ऐ ते सेहतमंद ते खुशहाल भविक्ख लेई स्हाड़ा मार्गदर्शन करा'रदा ऐ। उपराज्यपाल होरें आखेआ जे स्हेई मायने च सेहत ऐ शरीरी, दिमाग ते भावनाएं बश्कार संतुलन बनाना। खासतौरा पर अज्जै-कल्लै दे आधुनिक दौर च। अंतरराष्ट्री योग दिवस दे सरबंध्य च प्रधानमंत्री नरेंद्र मोदी हुंदे स्नेह दा सिद्धा प्रसारण कीता गेआ।

<><><><><><>

PM Navy Platforms

प्रधानमंत्री नरेंद्र मोदी होरें अज्ज कोलकाता च स्वदेशी तौर पर बनाए गेदे भारती नौसेना दे त्रै पोत - आईएनएस दुनागिरी, आईएनएस संशोधक ते आईएनएस अग्रय गी राष्ट्र गी समर्पित कीता। इस मौके पर उनें आखेआ जे भारत, जहाज निर्माण दे खेतर च नमीं सोच दे कन्नै अगगे बधा करदा ऐ। प्रधानमंत्री होरें आखेआ जे केंद्र सरकारै हाल दे बरें दरान केई नीतिगत सुधार कीते न ते घरेलू निर्माण समर्थ बधाने ताई बशेश गैहीं पुट्टियां गेइयां न। उनें गलाया जे ज्हाजें दे रक्खरखाs, मरम्मत ते संचालन गी इक बड्डे राष्ट्री मिशन दे तौर उपपर दिक्खेआ जा करदा ऐ। श्री मोदी होरें आखेआ जे इनें युद्धपोतें दा नौसेना च शामिल होना भारत दे भविक्ख दी सारत ऐ। उनें गलाया जे समुंदरी खेतर, विकसित भारत लेई रोजगार दा बड्डा जरिया बनी सकदा ऐ ते औने आहले बरें च लक्खांबद्धे नमें रोजगार पैदा होने दी मेद ऐ। प्रधानमंत्री होरें आखेआ जे रक्षा उत्पादन दे कन्नै-कन्नै रक्षा निर्यात च बी ऐतिहासिक बाद्दा होआ ऐ।

<><><><><><>

NEET-Exams

राश्ट्री योग्यता ते दाखला म्तेहान यानि नीट यू.जी दा म्तेहान अज्ज सख्त सुरक्षा बंदोबस्तें तैहत परतियै लैता गोआ ऐ। इस म्तेहान च 22 लक्ख 79 जहार शा मते मेदवार शामिल होए न। एह म्तेहान भारत दे 551 शैहें सने बदेशें दे बी 14 शैहरें च अज्ज दपैहरी 2 बजे शा लेइयै संझा सवा 5 बजे धोड़ी लैता गोआ। म्तेहान च अंग्रेजी ते 12एं भारती भाशाएं च जोआब देने दा विकल्प हा। म्तेहान शा पैहले म्तेहानें सरबंधी राश्ट्री एजेंसी एन.टी.ए नै कल पूरे देशें च माकड्रिल आला अभ्यास करियै अपनी सारी बवस्थाएं दी परख कीती ही। म्तेहान लेई मते-स्तरें आहली सुरक्षा बवस्था कीती गेदी ही जेहदे च सी.सी.टी.वी. निगरानी, आधार कन्नै जुड़ी दी बायोमेट्रिक ते सोआलें आहले पर्चे गी जी.पी.एस. कन्नै लैस गड्डिएं दे कन्नै पुलस दी सुरक्षा बवस्था हेठ इक थाहा दुई थाह लेता जाना शामिल हा। म्तेहान गी बवस्थित, सुरक्षित ते पारदर्शी ढंगगै नै करोआने लेई 2 लक्ख शा मते कर्मियें गी तैनात कीता गेदा हा।

<><><><><><>

NEET-Exam

अज्ज पूरे जम्मू जिले च नीट यू.जी दी पुनः परीक्षा कड़ी सुरक्षा ते प्रशासनिक इंतजामें कन्नै करोआई गई। पूरे जम्मू जिले च इस परीक्षा दे 27 केंद्र बने दे हे ते राष्ट्र परीक्षण एजेंसी एनटीए दे दिशा-निर्देशें मताबक सब्भनै इंतजाम कीते गेदे हे। परीक्षा गी रमानदारी आहले ढंगगै सिर करोआने आस्तै परीक्षा केंद्रें पर पुलस तैनात कीती गेदी ही, विद्यार्थिं दी शारीरिक जांच बी कीती जा'रदी ही, ट्रैफिक प्रबंधन समेत होर हीले बी

कीते गए ते परीक्षा केंद्रें च विद्यार्थिं दे प्रवेश ते निकास आस्तै विशेष टीमें गी बी तैनात कीता गेदा हा।

<><><><><><>

TN Gas Leak

तमिलनाडु दे पेरियापालयम च स्थित इक समुंदरी खाद्य निर्यात कंपनी च अमोनिया गैस लीक होने दी घटना च 7 लोकें दी मौत होई गई ऐ जिसलै के 70 शाम ते कम्मगार प्रभावित होए न। हादसे आहली थाहै पर बचास ते इलाज दे कम्म जारी न ते मरने आहलें दी गिनतरी होर बधी सकदी ऐ। घटना दे बाद एनडीआरएफ ते रसैनें, जैविक ते परमाणु आपदा कन्नै निबबड़ने आहली बशेश टीमें फौरी राहत ते बचास अभियान शुरू करी दिते। मुख्यमंत्री सी. जोसेफ विजय होरें घटना दी उच्चस्तरी जांच दे हुक्म दिते न। उ'नें त्रै सदस्यें आहली जांच कमेटी खडेरियै 24एं घेंटे दे अंदर रपोर्ट सौंपने लेई आखेआ ऐ। मुख्यमंत्री होरें आखेआ ऐ जे कसूरवारें खलाफ सख्त कार्रवाई कीती जाहग। उ'नें मरने आहलें दे परोआरें गी 2-2 लकख रुपें दी सींधी सहायता देने दा बी ऐलान कीता ऐ।

<><><><><><>

Prez. Convocation

राष्ट्रपति द्रोपदी मुर्मू होरें अज्ज जबलपुर च रानी दुर्गावती विश्वविद्यालय दे 36में दीक्षांत समारोह च हिस्सा लैता ते बेहतरीन कारकरदगी दस्सने आहले विद्यार्थिं गी सुन्ने दे तगमे भेंट कीते। इस मौके पर बोलदे होई उनें आखेआ जे रानी दुर्गादेवी साहस

ते वीरता दी प्रतीक हियां ते औने आहली पीढ़िं गी उंदे थमां प्रेरणा थहोंदी रौहग।
राश्ट्रपति होरें आदिवासी समुदायें, वंचित वर्गें ते कुड़िं दे सशक्तिकरण आस्तै शिक्षा दे
महत्व पर जोर दिता।

<><><><><><>

British PM Resignation

ब्रिटेन दे प्रधानमंत्री कीर स्टारमर हुंदे पर लेबर पार्टी दे नेता दे औहद्धे शा हटने दा
दबास बधदा जा'रदा ऐ। उत्थे गै किश आलोचक, एंडी बर्नहम होरें'गी उं'दा वारिस बनाने
दी मंग करा करदे न। इस हफ्ते दी शुरुआत च उत्तरी इंग्लैंड दे मेकरफील्ड उपचुनांs च
बर्नहम हुंदी नतीजाकुन जित दे बाद एह् मंग होर तेज होई गेई ऐ। उ'नें नाइजेल फराज
दी रिफॉर्म यूके पार्टी गी हराइयै अगले नेता दे तौर पर अपनी साख होर मजबूत कीती
ऐ। तोआई, स्टारमर हुं'दा आखना ऐ जे ओह् पार्टी दी अगुवाई करदे रौहडन ते एह्दे लेई
कुसै बी चुनौती दा सामना करडन। उ'नें आखेआ कि जेगर नेतृत्व लेई कोई चुनांs होंदा
ऐ, तां ओह् औहद्धा छोड़ने दे बजाय चुनांs लड़डन। इंग्लैंड ते वेल्स च हाल च होए दे
मुकामी चुनां च पार्टी दे खराब प्रदर्शन दे बाद स्टारमर हुंदे पर अपनी गै लेबर पार्टी दे
अंदरा इस्तीफा देने दा दबास बधा करदा ऐ।

<><><><><><>

USA-Iran Talks

अमरीका ते ईरान दे बश्कार नाजुक अंतरिम समझौते गी मजबूत करने ते पच्छिम
एशिया संघर्ष गी खत्म करने दे जतनें गी अगगे बधाने दे मकसद कन्नै गल्लबात

अज्ज स्विट्जरलैंड दे बर्गेनस्टॉक च शुरू होई गई ऐ। एह गल्लबात कतर ते पाकिस्तान दी पैंची च होआ करदी ऐ। अमरीकी प्रतिनिधिमंडल दी अगुवाई उपराश्ट्रपति जे.डी वेंस करा'रदे न, जिसलै के ईरान दे प्रतिनिधिमंडल दी अगुवाई उत्थुं दे संसद अध्यक्ष मोहम्मद बगेर गालिबफ ते बदेश मंत्री अब्बास अराघची करा करदे न। एह बैठक ऐसे समें च होआ करदी ऐ जिसलै ईरान ने आखेआ ऐ जे लेबनान पर इस्राएल दे लगातार हमलें करी होर्मुज जल-डमरू-मध्य परतियै बंद करी दिता गेआ ऐ जिसलै के अमरीकी सेना दा आखना ऐ जे जलमार्ग सबनें ज्हाजें लेई बरोबर खुल्ले दा ऐ। ईरान ने आखेआ ऐ जे बर्गेनस्टॉक च ईरानी वार्ता दल ते कतर दे मध्यस्थें बश्कार इक बैठक होई। ईरान ते अमरीका अज्ज मगरा, कतर ते पाकिस्तान दे प्रतिनिधियें कन्नै चार पक्खी गल्लबात च हिस्सा लैने आहले न। इस वार्ता शा पैहले, अमरीकी प्रतिनिधिमंडल ने पाकिस्तानी मध्यस्थता दी टीम दे कन्नै बैठक कीती। इस प्रतिनिधिमंडल च बशेष दूत स्टीव विटकाँफ ते राश्ट्रपति डॉनल्ड ट्रम्प हुंदे जोआई जेरेड कुशनर बी शामिल न।

<><><><><><>

US VD Peace Talk

अमरीका दे उपराश्ट्रपति जे.डी वैंन्स होरें आखेआ ऐ जे दौनें मुख्यें बश्कार परमाणु मुद्दे पर गल्लबात दी रूप-रेखा तैयार कीती जाहग। तोआई, ईरान दे प्रतिनिधिमंडल दा आखना ऐ जे लेबनान च जारी संघर्ष दा हल कीते बगैर गल्ल अग्गे बदाना मुश्कल होग। इस दुरान अमरीकी राश्ट्रपति ट्रम्प होरें चेतावनी दिती जे जेकर 60 दिनें दे अंदर समझौता नई होआ तां अमरीका होर्मुज जलडमरूमध्य पर नमां शुल्क लाई सकदा ऐ।

<><><><><><>

Weather

मौसम विभाग नै अज्ज पच्छिम बंगाल दे तराई आहले इलाकें सने सिक्किम च मौलेधार बरखा दी चेतावनी जारी कीती दी ऐ। असम ते मेघालय च बी औंदे वीरवार धोड़ी किश थाहरें पर तेज बरखा बरने दा अंदाजा ऐ। एहदे अलावा पूर्वोत्तर दे राज्यें च इस म्हीने दी 26 तरीक धोड़ी बड़ी मती बरखा बरने दे असार न। बिहार, ओडिशा, समुंद्री कंडे आले कर्नाटक, तमिलनाडू, पुदुचेरी, रायसलीमा, कराईकल, केल ते माहे च बी औंदे मंगलवार धोड़ी तेज बरखा बरी सकदी ऐ। मौसम विभाग नै मच्छेरें गी इस म्हीने दी 25 तरीक तगर बंगाल दी खाड़ी ते अरब सागर च नेई जाने दी सलाह दिती ऐ। उत्तर-पच्छिम भारत च बद्धोबद्धत तापमान च कल्लै धोड़ी कोई बदलाव नेई होग ते अगले द'उं दिनें दरान एहदे च 2 डिग्री सैल्सियस तगर दी गिरावट औग जेहदे परैन्त कोई खास तब्दीली नेई होग। तोआई, विभाग नै पूर्वी उत्तर प्रदेश ते विदर्भ च अगले 3 शा 4 दिनें तगर किश थाहरें पर लू चलने दी शेंका जताई ऐ।

<><><><><><>

Women's Hockey

हाकी च भारत ने मेजबान न्यूजीलैंड गी अज्ज आकलैंड च खेड्डे गेदे फाईनल च 2-सिफर कन्नै हराइयै एफ.आई.एच. महिला नेशन्स कप दा दुआ खिताब जिती लैता ऐ ते कन्नै एफआईएच महिला प्रो लीग च बी अपनी थाह बनाई लैती ऐ। भारत दी तरफा नवनीत कोर ने पैहला गोल कीता ते मगरा सुनेलिता टोप्पो ने दुआ गोल करियै भारत दी स्थिति मजबूत बनाई दिती। भारती टीम ने बड़े सबर ते एहतियात कन्नै खेड्डे होई बरोधी टीम गी इक बी गोल दागने दा मौका नेई दिता ते खिताब अपने नांs करी लैता।

भारत दा एह दुआ नेशनस कप दा खिताब ऐ। एहदे शा पैहले भारत ने बरे 2022 च इस प्रतियोगिता दा पैहला खिताब अपने नांस कीता हा। इस प्रतियोगिता च भारत इक बी मैच नेई हारेआ ते अपने अभियान दरान उन्ने लीग मैचें च अमरीका गी 3-2 कन्नै, जपान गी 2-1 कन्नै ते उरुग्वे गी 3-2 कन्नै हराया। एहदे परैन्त भारती टीम ने सेमीफाईनल च चिली खलाफ 6-0 दी बड्डी जित हासल कीती। इस बड्डी उपलब्धि दे जश्न दे तौर उप्पर हाकी इंडिया ने टीम दी हर इक खेड्डारन लेई 3-3 लक्ख रपे ते सहायक अमले लेई डेढ़-डेढ़ लक्ख रपे दे नगद ईनाम दा ऐलान कीता ऐ।

<><><><><><>

PM-FIH Hockey

प्रधानमंत्री नरेन्द्र मोदी होरें भारती महिला हाँकी टीम गी एफ.आई.एच. महिला नेशनस कप दा दुआ खिताब जितने पर मुबारकबाद दिती ऐ। सोशल मीडिया दी इक पोस्ट च श्री मोदी होरें टीम दी सराहना करदे होई आखेआ ऐ जे टीम ने पूरी प्रतियोगिता च बड़ा शानदार प्रदर्शन कीता। उ'नें आखेआ जे भारत महिला हाकी टीम दी एह जित, केई युवा खेड्डारिएं गी हाकी दे खेड्ड कन्नै जुड़ने ताई प्रेरित करग। मोदी होरें भारती टीम गी भविक्ख लेई शुभकामनां बी दित्तिआं न।

<><><><><><>